


D5

785


C46

1777

v. 2







西域聞見錄卷三

外藩列傳上

哈薩克

哈薩克伊犁西北一大國也卽古之大宛
乾隆二十一年 大兵進勦入其巢穴其
汗阿布賴面降歸服 王化受封爵奉正
朔人民土宇悉入版圖其地無城郭屋宇
之定居不藝五穀氈帳爲家遊牧爲業分

布散處亦無愛曼聚落地多平岡漫嶺草
生被野綠葉白根長四五寸牲畜食之易
於腓字稱其君曰比相呼皆以名今其王
名阿布賴國人皆呼之爲阿布賴比也幅
幘遼廓人戶殷繁牲畜衆多富者馬牛以
萬計羊無算數人其妻輪流晏處生子至
十六歲輒析產予之牲畜使自爲計宴會
以駝馬牛羊爲饌馬湏爲酒器用皆以木

爲之富者用銅錫以衣多爲華美雖夏月
炎熱亦被服八九層而後赴筵最喜中國
之磁器茶葉雜色梭布及片金倭緞之屬
得之寶貴紬緞綾絹不復愛重矣無刑罰
紀律王之命令亦不甚遵如人有罪則衆
共紛議罪小罰以牲畜罪大則其殺之而
分其產亦不必關白於王卽禦外侮戰鬥
之事亦其王與衆約會不願者不相強也

歲有納中國之稅牛馬百取一羊千取一伊犁將軍遣官入其國徵收其王與頭目人等徵之於衆初則大費躊躇蓋其人之意以爲天生水草天產牲畜我等自費經營如何有貢賦之說其王反覆開導然後勉從然亦未致缺額而今則輸將恐後矣哈薩克兩種其一爲阿布賴比及其弟阿布爾必斯阿布爾班必竝各台吉所屬與

伊犁撻拉巴哈台連界臣服中國每年驅其牲畜至邊交易紬緞而去其北界之哈薩克又是一種未通中國人戶尤強盛云椿園氏曰漢貳師將軍李廣利將數萬之衆出燉煌萬里殺大宛王取汗血馬三千餘匹身膺侯封當時神其說者有龍種之號天馬之稱哈薩克地固產馬通國計之不啻萬萬之數雖高大多力

率多駑駘調良俊軼者干不得一烏覩
所謂汗血者乎地旣肥饒宜於遊牧以
故富足然地近安集延布魯特時相攻
奪弱者之肉强者之食矣

布魯特

布魯特回子之一部落也地界安集延喀
什噶爾之間地廣人衆稱其君曰比或有
管領一二十愛曼者或有管領二三十愛

曼者愛曼人戶卽其阿拉巴圖雖皆爲布
魯特而其比不一各君其地各子其民力
敵勢均不相統轄不蓄一髮如其比死立
其比之子若弟他人不得與也忌猪肉衣
窄袖敞前襟帽矩方平頂女子插雉尾以
飾帽風俗語言與回疆大同小異氈帳爲
居遊牧爲業以肉爲食牛馬乳爲酒有額
魯特之風矣喜中國之磁茶紬布煙酒珍

之如寶人貧而性悍輕生重利好殺掠劫
奪勇於戰鬥哈薩克博羅爾皆畏憚之卽
準噶爾強盛之時亦不能使之臣服回子
出邊及外國人至內疆貿易者往往爲其
擄掠而去 大兵平定西域而後始戢不
敢騁其各北每年遣使至烏什與參贊大
臣請安進 貢

大皇帝馬匹絡繹不絕乾隆二十三年

大兵征討霍吉占其附近喀什噶爾之布魯特比阿奇木震懾天威帶領所部愛曼人戶阻攔霍吉占悉力與戰

上嘉許其功加其比阿奇木爲散秩大臣授職爲塔什伯里克回城之阿奇木伯克其餘頭目皆賞戴頂翎有差今其部下人戶雜處於葉爾羌喀什噶爾烏什之深山密林之中安居遊牧焉

西垣隱居集卷三 五
椿園氏曰富則恣淫貧則攘攫西域之
習尚然也布魯特地瘠人貧無農桑之
利山多磽确乏遊牧之資故其人貧貧
則盜盜則習於強梁而無恥所謂無恆
產是以無恆心也使鼯鼠飽於餘粒鷦
鷯穩於一枝則足以窮其伎倆矣

安集延

安集延回子一部落也其汗額得訥最爲

著名旣死其弟納拉帕塔立統領四城最大者曰豪罕三萬餘戶爲其汗之巢穴次曰瑪拉噶朗二萬餘戶次曰奈曼萬餘戶最小之城曰安集延千戶耳四城之人皆其汗之阿拉巴圖乾隆二十三年歸附

中國在布魯特之西有城池屋宇村堡田園業耕種土產穀豆瓜果皆備而桃稱獨絕畜牛馬恆圍獵人不畜髮辮禁猪肉衣

圓領窄袖帽方無翅其人率居權子母積
載貨行賈冒雪霜犯危險經年累歲不獲
利不歸內地皆呼之爲安集延回子亦猶
各城回子至外國總呼之爲喀什噶爾回
子也

椿園氏曰安集延克食米兒皆西域商
賈之鄉儉嗇褊急習染成性寄跡回疆
土人皆惟恐其去去則其地之貨財不

能流通而回人大有不便矣

博羅爾

博羅爾西域別一種也在葉爾羌西以土
築屋而居有村落無文字不通回子語言
惟衣帽與安集延彷彿其人深目隆鼻繞
喙濃髭其風男女無別恆弟兄四五人共
娶一妻次第歇宿以靴懸戶上爲記生子
女亦以次第分認無弟兄者與戚里夥之

以齒爲序地多砂磧壤鹵可耕者稀人多
苦貧歲收不過二麥一半畝而已多桑取
甚曝乾爲糧或山羊之乳借以餬口馬潼
爲酒稱其君曰比以人爲賦稅凡生子女
六七人則納其三四五人則納其二所賦
子女皆鬻於溫都斯坦哈薩克安集延及
內地各回城爲奴婢值頗昂每口以五六
十八九十金爲率性怯懦往往爲布魯特

沙關記擄掠人口鬻於他處亦不能校
椿園氏曰雖凶荒災祲之極而回俗無
賣男鬻女事故大戶回人奴僕甚少所
有者多是博羅爾子女耳近年以來土
爾扈特霍碩特亦多鬻子女與回人爲
奴良可慨已

敖罕

敖罕一大國也回子謂之克則爾巴什在

退木爾沙之西其地絕長補短方數千思
稱其王曰汗城池壯麗人戶富盛天氣酷
熱多雨多奇花異果五金珠玉寶石金剛
石松竹杉皆其土產有瘴氣多猩猩亦通
其人言語巨蟒長蛇熊羆虎豹不一而足
地產象耕田負重皆取於象間有牛如中
國之象男女聚觀以爲罕物風俗淫佚無
人倫尤重男色人人皆有姣童童之袴皆

緊束以細鎖鎖之以防外遇其人種類不
一有與內地回子相似者有與安集延相
似者有與額魯特相似者有與土爾扈特
相似者有鬚髮卷曲與鄂羅斯相似者又
一種人亦回子衣帽但目益深鼻益高睛
碧色鬚繞頰如蝟而赤如丹砂多力而橫
恣遇有戰陣輒爲前鋒無火鎗弓矢專用
木矛沖突於矢石之間矯疾無倫其鬚用

茜草染之以爲丰采西域人皆畏之又一種人圓領大袖衣冠類漢唐之制貌多清秀似朝鮮人或謂是後漢之遺種云人類雖別各有部落頭目然皆敖罕汗之阿拉巴圖奉其教令而侵凌相尙刦掠成風旣大遠於中國聖人之教又不解佛教慈悲之說嗜殺好利篡奪相循與溫都斯坦地界毗連各以威力相制迭爲强弱乾隆二

十年與中國通歸入王化
上憫其險遠寬其歲入之常
朝貢獻
亦無定制聽其抒誠而已

椿園氏曰敖罕西域之大國也亦西域
之亂邦也種類不同詐力相同人人有
自利之心日日皆逐鹿之勢篡奪相循
自古然矣

溫都斯坦

亦西域回國之大者也葉爾羌西南馬行六十餘日至克食米爾克食米爾復西南行四十餘日至溫都斯坦水亦可通兩地貿易之人多資舟楫往來不絕稱其王曰汗其都城雄壯周圍六十餘里轄大小回城三百七十餘其人深目高鼻多鬚目睛墨白光如琉璃面黑色唇青色言語類鳥鳴回子亦不能辨衣敞前襟帽纏花布厥

土黑墳地極溽暑瘴癘爲害人有頭面生
贅疣引之而長放之仍縮者地以象耕服
車致遠皆取給於象有牛馬無駝羊騾驢
不解遊牧之事粳糯秔稻及瓜果蔬菜靡
不繁植檳榔桃榔欖櫚橘柚在在成林冬
不凋葉人習技巧金漆雕鏤制作精奇所
製玉器薄如蟬翼文成如髮抽金銀爲絲
織紉緞氈布遍貨於西域各國及各回城

所居穴地深數丈旁掘土洞爲室室亦絕
精飾以金玉從無地上起屋竝園亭之事
其城村似曠邈無人煙處也郭外大澤一
山水秀麗花木蔚然居人多攜簪乘舟累
月經旬游於其內多美釀尚宴會必費數
百金亦多載酒泛舟於澤中者凡其地之
公私事務及一切農工商旅操作交易皆
於夜間爲之日出則伏國旣富庶風俗奢

靡其地亦有玉山獨少白金價過黃金也
最貴中國磁器或有攜至其國者爭以白
玉盤碗交易而去惟恐失之而大黃尤爲
至寶以黃金數十倍兌換蓋其地之一切
疾病瘡瘍得大黃卽愈百不失一貴客來
及大筵宴皆以大黃代茶人若經年不服
大黃則必死故雖貧苦小回亦必有一半
兩大黃囊繫胷前舌舔而鼻嗅之其地之

江河皆通海洋時有閩廣海航到彼停泊
多有以大黃漁利者兩廣福建之物往往
有之或重販至葉爾羌轉入中國矣哈什
噶爾回子買得漳絨一端上有漢字天順
字號固閩貨也其國西隅有巨澤圍數千
里澤中有山圍逾千里萬峯聳峙高入雲
天或曰人間第一高山也名曰牽各里麻
膽達喇斯山中產獅子於秋月皎潔輒負

雛於山中往來頭大而毛虬尾形如帚黃
質黑章如虎皮長六七丈時登山絕頂望
月垂涎咆哮跳擲猛飛吞月有飛去八九
里十餘里而墜死山谷中者其國人以豢
養獅子爲上戶每當秋月其汗使人取獅
以精鐵作柱大如瓮密布層遮圍畜之於
其中飼以牛時而吼如雷霆滿城震動人
畜不寧取之之法擇礮手之最精者開地

爲阱人匿其中遇有負雛者來乘其不備
發礮斃之而取其雛倘一礮不中則拋山
裂石人無噍類矣

椿園氏曰乾隆四十年有溫都斯坦之
海蘭達爾遊至回疆予晤其人面黑脣
青睛如琉璃據云彼乃其地之白皙者
耳又云其國之西南數萬里有黑白之
人白者如雪黑者如漆國在大海之中

得毋卽東粵之所謂黑鬼白鬼者歟因
細談其地之事甚詳與予向所聞無異
而牽各里麻膽搭拉斯之山高聳至極
靈蹟最著其卽古人所言日繞之峯歟
顧山雖至高無出沒日月之理四圍皆
水舟楫可通亦無所謂弱水焉其地暑
而多瘴多雨類閩廣水土惡劣之鄉而
山有寶地生毛故人繁而殷富惜乎象

西域圖志卷之三
胥通言不能盡解其說所得考核存據
者亦僅參半焉爾

克什米爾

克什米爾回子一大國也葉爾羌西南馬
行六十餘日可至其國中隔一冰山人畜
至此須土人駝牽而過其險尤甚於木素
爾達坂其人深目高鼻黃睛多鬚衣圓領
窄袖無髮辮飲食尤多禁忌禮拜尤虔語

言強半可通稱其君曰汗所屬回衆近百
萬戶城池周三十餘里時序平和冬無嚴
寒夏無酷暑地土饒沃產名香白檀紫降
人多奇巧精於關捩之術能於山麓起樓
引水逆上自樓後倒垂前檐如水晶之簾
善貨販興利江河之水多通海洋俗尚宴
會喜歌舞娶婦花燭之夕輒先有物入洞
房新婦輒昏瞽聽其淫污而去亦不知爲

何物從古至今萬千不爽天時和正山水
娟秀溫都斯坦之富商多有家於其地者
椿園氏曰嘉峪關外多流沙之水間有
水泉卽回人聚居之所餘皆戈壁益西
萬里逾布魯特之境莫不皆然雪山之
陽一派沙石兀突怪惡不可形容聞之
金寶之山其上不生草木信乎至克什
米爾以西以北時旣清淑山川亦皆秀

麗別有天地矣而溫都斯坦敖罕各國
極熱多雨無霜雪一切飛潛動植與中
國之間廣無異豈以其近海之故歟人
習工巧製造亦詭異精奇且多術士南
宮蛙蛻之法五通青蛙之類往往而有
焉

巴達克山

巴達克山回國也在葉爾羌西馬行三十

日可至其地羣山環繞田土膏腴築室以
居耕田而食亦有牧放圍獵之利禁豬肉
衣帽同安集延稱其君曰汗愛曼人戶四
五萬皆其汗之阿拉巴圖風尚淫蕩喜男
色土產米豆棉花瓜果寶石黃金乾隆二
十三年霍吉占叛兵由葉爾羌敗走巴達
克山欲奔溫都斯坦其汗蘇爾坦沙率兵
截路與之拒戰霍吉占及其兄布拉敦皆

死輜重眷屬悉爲蘇爾坦沙所獲竝霍吉
占弟兄之尸獻之中國遂蒙

上賞而布拉敦之子薩木薩克與其黨千
人突圍走退木爾沙退木爾沙之汗畱之
因唆令退木爾沙之汗向蘇爾坦沙索取
人口不與兩國遂成仇敵互相戰鬪相持
二年之久巴達克山大敗爲退木爾沙所
族滅回衆盡遭擄掠近年以來其逃亡人

口漸集故地復有千餘戶矣

椿園氏曰蘇爾坦沙強力勇鬪之人也
卒以獷悍之故一敗塗地地方其與退木
爾沙交惡也雖衅端開於薩木薩克而
兩國交戰實各有利心夫西域諸國之
互相仇殺非必利其土地以擴疆宇也
非必臣其人民以歸編戶也不過取其
財貨分肥以爲利掠其人口販賣以爲

利強吞弱大併小則其常然無足怪者

退木爾沙

退木爾沙巴達克山之西一同國也人七
萬餘戶地悉萬山之中草肥水甘牲畜蕃
息以氈帳爲家游牧爲業稱其君曰汗國
無貧乏之人而強悍性成剗掠成俗帽方
而上平韉以牛羊革爲之衣敞前襟窄袖
束腕有布魯特之風乾隆二十三年布拉

敦之子薩木薩克逃至其地其汗畱之後
因而滅巴達克山敖罕聞之大怒曰退木
爾沙巴達克山原係鄰好素無仇隙奈何
因他人之事自殘脣齒不義孰甚因大起
甲兵往侵退木爾沙一鼓而滅之退木爾
沙之汗亦被夷族之禍薩木薩克被擒今
其所存者亦止千餘戶耳

椿園氏曰螳螂捕蟬而黃雀伺於其後

黃鳥機深而彈丸起於其旁自非明智
開通鮮不驅諸陷阱況回人之惟利是
圖不恤其餘者哉退木爾沙以膏腴險
固之邦十萬精強之衆使其保境安民
何至一朝殄滅顧乃衅端起於小忿兵
戎動以無名卒之身死國亡同歸殲滅
不必更笑其愚且堪取以爲戒矣

沙關記

沙關記者葉爾羌回子也爲霍吉占之黨羽大兵底定回疆霍吉占弟兄伏誅沙關記逃至外藩無人之境苟延性命同時逃竄之回子及額魯特人等漸集其地羣推沙關記爲君有衆五千人鐵甲三百副鳥鎗五百桿踞空闊之地起屋宇墾土田漸加殷庶其人兇暴喜殺常爲中外貿易商旅之害夙與葉爾羌阿奇木伯克鄂對

本係仇讎乾隆四十一年鄂對之貿易回
子悞入其地沙關記卽行擒縛畏天朝
之威不敢殺戮置之地牢中四十日沙關
記忽自將其父母妻妾子女盡皆綁出喚
出鄂對之貿易回子令其看視而問曰鄂
對在葉爾羌敢殺人否回子曰有天朝
之法度在不敢私殺人沙關記曰鄂對且
不敢殺人如何算得好男子我不但敢殺

人且敢殺我之父母妻子遂俱行凌遲放
鄂對之回子歸葉爾羌使告之鄂對沙關
記之利害如此後沙關記之回子亦被鄂
對捉得置地牢中六十日放出令其徧觀
城池人戶牲畜器械寶玉藝器絢緞之類
亦使其歸告沙關記鄂對之利害如此其
地在葉爾羌西馬行三十餘日沿途以馬
通爲炊沙雅爾伊什罕伯克阿拉呼里隨

將軍兆惠平定葉爾羌時曾奉令往探其地因戈壁甚大無柴草故未能進兵勦滅也

塞克

塞克西域一大國也在熬罕西絕非回子種類稱其王曰汗部落數百處各有統轄之人皆其汗之阿拉巴圖事權歸一無跋扈叛弑之事城池巨麗人民殷庶居室盡

西土圖見錄卷三
一
敞整潔人家院落中各立木竿向之禮拜
冬夏和平風俗坦白尚宴會喜歌舞以猪
肉爲上饌野牲爲常食人多力善射發必
命中佩標鎗五枝長四五尺取物於百步
之外與敖罕稱勍敵也

椿園氏曰塞克西域最遠之國去葉爾
羌二萬餘里西北與控噶爾薩穆接壤
或曰與阿喇克等國犬牙相錯大抵皆

世俗所傳之大西洋也然而塞克之邦
風朴民淳人無欺詐尚氣節敦廉恥不
得以荒遠而鄙夷之也

西域聞見錄卷三

西域聞見錄卷三

三

西域聞見錄卷四

外藩列傳下

鄂羅斯

鄂羅斯北邊之大國也東界海南界中國西北鄰喀爾喀東西距二萬餘里南北窄狹自千里至三千餘里不等稱其王曰汗自鄂羅斯之察罕汗歿無子國人立其女爲汗嗣後皆傳女迄今已七世矣仍襲其

祖名號故國人猶稱爲察罕汗也其女主
有所幸或期年或數月則殺之生女畱承
統續謂其汗之嫡嗣也生男則以爲他人
之種也其人深自高鼻睛碧鬚髮黃赤男
女皆蓄髮男髮頻以膠水刷之使其卷曲
女髮梳爲高髻男衣縛身徧體扣繞女衣
裙衫袍褂悉如漢裝但不纏足耳無褻衣
故裙長而兩襲以銀爲錢鑄文肖其汗之

面重七錢餘謂之阿拉斯朗以洋算成歲
分至啟閉建閏日月蝕纖杪無差喜樓居
有四五上者其梁柱頂壁皆用木密灌油
灰不需瓦爇而金粉雕鑿極盡人工開窗
四達或飾以各色玻璃鏤金銀絲以隔蔽
之次用其國之田皮紙率皆修整可觀木
多易遭回祿故火禁最嚴一有不虞則萬
家灰燼室中皆牀几椅檠酷似南方男女

皆不能盤膝坐一日兩浴見親友賓客無
跪拜揖讓之儀惟接吻以爲禮嗜茶然必
調糖而飲啜之食以麥麴爲常饌魚爲上
品猪次之以大茴爲佳味人人嗜之穀米
則充牲畜棧豆而已都城雄壯圍數十里
官制文武皆懸刀爲佩刀柄有玉金銀銅
錫鐵之區別官階等級視其刀柄而知其
民皆耕田納稅三丁抽一五丁抽二以爲

兵兵各有營自十六歲入營給伊馬匹器械卽不準歸家不娶妻日居營中習學訓練遇有戰陳之事則隨其將領而去月支阿拉斯朗錢一文糧一石年至五十而後出伍刑罰極嚴男犯盜女犯姦殺人不問謀故鬪悞以及出邊私入別國者概以斧剝殺之其國名山大川甚多地之肥沃濂鹵亦錯雜不齊土產白糖冰糖紙茶噶拉

明鏡玻璃元狐黑貂狔狔銀鼠灰鼠海
龍水獺但金銀缺少其餘果蔬之類咸備
鄂羅斯本控噶爾屬國稱臣納貢由來已
久乾隆二十年後察罕汗恃其強大不復
稱臣缺其貢獻復興兵擾其邊境以故兩
國連兵數年不解鄂羅斯累遭大敗喪師
二十餘萬因而大困力不能支仍復稱臣
常貢之外歲增納童男五百童女五百而

後罷兵其俗最重君臣之義如其汗雖無
道之極亦無有敢議其是非者自古無叛
逆篡奪之事一姓相傳不知其幾千年視
他國之朝夕易姓者相懸矣案西北域記
鄂羅斯一名羅刹古丁零國也夜短晝長
多江湖通舟楫土產五穀六畜百果諸蔬
及玻璃色氈金紙白鐵紅黑牛皮皮毳之
屬其人皙面隆準深眶綠睛亦有黑睛者

漢李陵之裔也卷髮赤鬚衣止裹身履無
前齒嗜酸辛貪杯酌餐薨蠹飯粒舂橫板
爲屋柵木爲城鑄銀爲錢編石爲簡其教
宗耶蘇康熙年間始與中國通遣其俊秀
入我國學譯業受四子書而去乾隆二十
年後以阿睦爾薩納之故土爾扈特之嫌
復絕其貿易不復與通

椿園氏曰鄂羅斯雖爲大國而地形長

狹無率然環顧之勢且介乎中國控噶
爾之間議守之處太多故僅足自立乾
隆二十年後與控噶爾連兵不解控噶
爾用荀瑩故智東西疊駕虛實聲擊致
鄂羅斯地境瓜分棋判往來救援疲於
奔走然後控噶爾大舉入境圍其國都
數千年相傳之統幾至夷滅迨稽顙稱
臣歲增朝貢幸控噶爾仁慈不輕滅人

之國舍之而去則察罕汗不知度量不
察形勢之所致也有國家者軍旅之事
可不慎哉然其愛國忠君之義親上死
事之風君子固有多之者矣

控噶爾

控噶爾西北方回子最大之國地包鄂羅
斯東西界之外稱其王曰汗其大頭目亦
謂之阿奇木伯克所轄各城自萬戶至十

餘萬戶不等均爲其汗之阿拉巴圖合各
城計之小屬於大每一大城屬小城或三
或四以至十餘大城阿奇木伯克共計一
千四百餘員建都之城名務魯木極廣大
南北經過馬行九十餘日東西亦然城門
二千四百城內大江三山河藪澤不可勝
計宮室闊遠深邃綿亙數十百里黃屋朱
門皆以金玉珠貝爲飾地產金銀多於石

子珊瑚珠玉數見不鮮自鳴鐘表紬緞氎
蜀尤多奇異俗重大紅寶石如拳如卵者
人人懸佩黃金爲錢每文重二兩許居人
田園廬舍墳墓牧場各分地界散布而居
各種公田猶是古井田法所轄之地有不
富饒者其汗聞知輒親往巡視暗攜金銀
無算潛拋擲於人煙聚集之區如金銀徧
地間有拾取者尚謂無害如拾取人多甚

至爭拾其汗則惻然而憫惕然而懼因廣
爲施濟必致比戶豐裕而後已故入其地
者曾未有一貧窶襁褓之人干求借貸之
事風俗敦厚知禮讓彝倫攸敘與中國不
殊迥非西域各國禽行獸處之比唯敬天
地日月不知有神鬼仙佛聖人之道每日
黎明男女禮拜唸經之聲雷動猶天主教
之風最戒軍事其說以天地生人無非同

類奈何以人殺人自殘同類之理故國雖
富強從無侵凌附近弱國之事而兵則精
銳鳥鎗可及二百餘步以死敵爲勇敢而
歸者終身不齒於人數其兵無入伍食糧
之事入爲農出爲兵訓練皆於農隙亦同
三代以上法也如有軍事其汗量敵之大
小命其阿奇木伯克或一人或二三人各
遷其部下壯丁前往應敵鄂羅斯本其屬

國歷有年所乾隆二十年後鄂羅斯停其
貢賦七年未嘗責問而鄂羅斯反以兵相
加控噶爾撥兵大戰鄂羅斯全軍覆沒喪
師八萬察罕汗又起十萬之衆更借土爾
扈特精兵數萬與控噶爾再戰又復大敗
以故土爾扈特大懼於乾隆二十五年棄
鄂羅斯而投誠中國而控噶爾戎兵數十
萬出境長驅直壓鄂羅斯國都察罕汗大

恐求和稱臣定於常幣之外歲納童男女
各五百人控噶爾許之乃舍去或曰控噶
爾西界亦多其屬國歲修朝貢之禮如鄂
羅斯云

椿園氏曰控噶爾唯知天地日月無神
聖仙佛之說蓋西北則咸尊天主之教
矣至其國富民殷人無詐僞仁而戒殺
故人親其上無敵於四國孟子曰仁者

無敵固不在華夏戎狄也

郭罕

郭罕西域回子之一國也風俗衣冠居室
土產與新疆回子略同唯語言不通在葉
爾羌西馬行四十日可至稱其君曰汗其
人短小男女皆長二尺餘魁梧俊偉者亦
不能過三尺然尚氣好鬪少有不合卽裂
眦相向有笑其么麼者則抽刀併命怒不

可解其地萬山環繞一夫當關百夫莫過
故雖小弱能自立於西域各國之間羊高
八九寸長尺餘肥美勝於他產牛馬高不
二尺駝之大如內地之驢時驅其羊數千
或數萬來葉爾羌貿易歸則攜布茶而去
椿園氏曰夙聞異域有僬僥之國人皆
三尺東方曼倩以西北大荒有小人
國朱衣元冠長皆七寸海鶴食之郭罕

豈其苗裔歟又聞其地麥顆大如芝麻
白楊高於江葦乃人小而一切飛潛動
植之物亦從之而收縮其天地雜氣之
所鍾聚乎

還擺特

還擺特西域別一種也在葉爾羌南馬行
四五十日至其地土宇與後藏相接無城
郭宮室鑿山爲穴以居種米麥以食又有

以游牧爲生者則以氍毹爲家人蓄辮髮耳綴金環其俗敬火每晨以柴燒火向之禮拜有事亦叩而禱之地斥鹵少出產富者僅足自給貧者多傭工於他國勤儉刻苦出自天性稱其君曰汗卽汗亦不能饒裕惟取所部子女鬻於各處爲奴取其值以自贍與博羅爾相似

椿園氏曰退擺特之人敬火其說以天

生五穀地產牲畜非火人何由而食之
人之所以生火養之也固爲荒陋偏僻
之論然習之所尚浸以成風毋亦燧人
氏之苗裔歟而辛勤自刻西域所不及
則民勞思善之謂矣

轄里薩普斯

轄里薩普斯在喀什噶爾之西馬行三十
日至其地大城有三皆其汗之阿拉巴圖

土產百果五穀六畜黃金人多巧思且多
妖法邪術風俗淫惡男女皆龍陽其塔里
扈魯斯城內有一土阜居城之中央他國
之人入其城者一見高阜輒心神恍惚必
欲登臨而後快登之則必欲至其巔至其
巔則瞥不知人逾時始蘇手握銅錢二文
下體已爲人所污西域回子皆畏而避之
而誤入被姦者正復不少但多諱而不言

耳葉爾羌大阿渾阿布都哈爾庫車同子
阿瓦茲皆曾遇此強暴人問之則怒不可
解而飲酒過醉往往自道其實而聞者無
不絕倒

椿園氏曰回地有劈里之妖好棲人屋
宇爲崇中之則發狂疾惑男則女惑女
則男人形長四五寸病者見之他人不
之見也回子中有能勅勒而制之者名

曰劈里渾制之之法取住人支解之其
妖卽滅劈里渾復呪誦數次則支解之
人斷體自續而復生毫無所苦自歸

王化以來不復敢支解人惟施之羊犬
無非邪魅之習至以術行淫則人而妖
矣以術行污穢之淫亦妖所不爲者矣

哈拉替艮

哈拉替艮在安集延之南重山複嶺之中

人戶寡弱不足六七千家稱其君曰比不蓄寸髮不食豬肉衣帽言語與安集延同氈帳爲居打牲爲業冬日嚴寒人皆覓山坳溫煖之處以大木蘆荻構屋而居人畜共處其中蓄糧聚草以禦冬寒至十月雪已盈丈三月雪融始可出作地產獨峯之駝

椿園氏曰哈拉替良居雪山陰奧之區

西垣圖見金史
雪至盈丈歲之常耳大雪之年有厚至
二十丈以外者人畜皆災矣所可喜者
強大之國以其寒苦不屑取之故常享
太平雖弱小而能存也

布哈拉

布哈拉回國也在葉爾羌之西馬行二十
五日可至城池闊大堅厚周圍十二門以
十二辰布之稱其君曰汗氣候炎熱冬無

大雪五穀一歲三收瓜兩熟人戶殷富習
尚技巧錢有金銀銅三品分別濟用重禮
拜城內外禮拜寺二百餘處晝夜納馬茲
數十次有私行飲酒遊蕩不納馬茲者羣
以爲敗類縛至禮拜寺塢頂擲殺之男女
好修飾其河產各種之魚土產重骨羊

椿園氏曰風俗移於好尚萬里應之如
響京師貴骨重羊之皮爲冠爲裘一時

從風而靡其羊短小肉薄但骨重耳黑者極多灰者十不得一皆產於布哈拉之地初不甚牧養自通中國以後大獲其利至今安集延西南諸國填山塞谷皆重骨羊羣也

附絕域諸國

瑪轄堤絕域一大國也都城八門稱其君曰汗地廣大肥沃土產同布哈拉多虎豹

犀象洋磁白糖栽毯金花白布善製大礮
以銅爲之一礮非十象百人不能挽運每
礮盛火藥數萬觔礮子之大者皆重二三
百觔羣子無算一發則掀天裂地威猛至
極呼之曰按布拉克又有自來火鎗可及
二百步路通海洋與西洋近

安他哈爾之城看他哈爾之城絕域部落
也多山人以松子核桃爲糧打牲爲業產

白礬鉛鐵

賽拉斯之城查爾丹衣之城絕域一部落
也以氈帳爲家地多山石沙壤可耕者稀
牲畜少人戶窮苦往往乏食以盜劫爲生
無鳥鎗弓矢人佩腰刀一柄山中生一種
野獸形似馬頗調良可施羈勒以乘行如
星電曰可千里名曰特克亞圖其人懸刀
騎獸四出劫掠遠近苦之言語與回子可

通

噶拉特之城查納阿拉巴特之城摩勒之城同一部落也言語與各國不通人以茜草染鬚居大水之湄牧放牲畜千萬爲羣食必有魚呼其水曰阿曼多龍龜有徑十丈魚有長千丈者水鹹苦甘泉亦間有之烏爾古特雅爾一部落也人皆同回子土產西瓜甜瓜最佳西域所產無出其右之

西域圖志卷四
長及七尺有圓大如車輪者沙棗之大如梨

盤家戡特之城帕爾海之城同一部落也
山多牲少所種小麥色白如粉大麥碧綠
桑椹有赤白黑綠四色皆大五六寸國人
賴以爲糧衣帽如同地阿渾之製語言約
略可通

巴喇哈絕域一大國也地廣民殷土產各

色寶石玻璃鐵白如銀五穀六畜百果諸
花皆盛四時常有赤鱗飛舞空中噴熱風
如火人觸之輒斃惟多食葱蒜大茴庶幾
得免故其人頻頻啖之又產獨角野羊多
水牯風俗淫亂語言與回子不通

科罕西域一國築室以居耕田而食能造
旨洒琥珀色味極清芳人富饒以金銀絲
緞噶拉明鏡爲衣倭緞爲緣以金銀絲繡

之衣多紅黑二色以海龍爲帽帽長三尺
餘皮韉木底底下密鐵釘不解馴馬人乘
牡馬而行風俗獷悍往往殺人時與哈薩
克交易通貿販

阿薩爾之城哈拉多拜之城巴拉之城哈
喇他克之城同一部落也以豆爲飯土產
寶石玻璃駱駝如驢國有一河飲之則癯
男女滿面如毛頭纏光明錦布子壯則多

殺其父

噶爾洗別一部落也地廣人稀多高山產
獅象其人終日謀醉男女皆然

薩穆絕域一大國也土地廣大亞於撻噶
爾居室修潔織異鳥之羽爲衣光彩奪目
阿拉克撻噶爾西北一大國也與薩穆相
類人多巧思冬能使之炎熱夏能使之飛
霜以金木製爲人形爲之服役然非邪詭

之術皆人力爲之

哈他木絕域一國人多力善射矢不虛發
地介鄂羅斯控噶爾之間係控噶爾屬國
阿諦在西海之濱與控噶爾連界其人皆
長三四丈無屋宇多處山坳林麓之間無
火器而有弓矢刀槊矢及一里餘然性極
懦畏金鼓之聲其婦女長短一如人形且
悉豔麗姣好與長人爲夫婦但不能生育

耳育必浴於河中而後成孕生女如常生
男則數丈矣喜生啖人畜常如控噶爾戰
得人馬則裂而啖之控噶爾喜其婦人端
麗往往千百成行鳴金伐鼓奮勇而前施
放鎗礮煙火彌漫其人皆戰慄恐怖竄匿
深山控噶爾亦不窮追但擄其婦女而歸
扎那巴特之城色里丹衣之城別什克里
之城阿色里巴拉之城同一部落也地多

石山其人於山下取土移之山上而後耕
種杏大色白而甘芳絕倫桑椹尤大人資
之爲糧冬夏僅皮衣一領男女徧身皆毛
冠而不裋

西域聞見錄卷四

